

Gutike, Conrad Dietrich
Helmstadt

LANE

MEDICAL



LIBRARY

**HISTORY OF MEDICINE
AND NATURAL SCIENCES**

AMERICAN BANK NOTE CO. LITHO

DISSERTATIO INAUGURALIS MEDICA
DE
REGIMINE CAPITIS
PRAECIPVE QVOAD
CALOREM ET FRIGVS
QVAM

ADNVENTE DEO
AVCTORITATE ET CONSENSV
ILLVSTRIS ET GRATIOSI MEDICORVM ORDINIS
IN ALMA IVLIA CAROLINA
P R A E S I D E

D. PETRO GERIKE

SERENISS. DVCIS BRVNSVICENSIVM ET LVNEBVGENSIVM A CON-
SILIIS AVLAE ET ARCHIATRO, CHEMIAE MEDICINAE THEORETICAE
ET MATERIAE MEDICAE PROFESS. PVBL. ORD. SOCIETATIS REGIAE
SCIENT. BEROLINENS. MEMBRO GRAVISSIMO ET FACVLTATIS
MEDICAE H. T. DECANO ATQVE BRABEVTA
SPECTATISSIMO

PATRONO PRAECEPTORE ATQVE PROMOTORE SVO
AD CINERES VSQVE PIE VENERANDO

PRO GRADV DOCTORIS
SVMMISQVE IN MEDICINA HONORIBVS ET IM-
MVNITATIBVS DOCTORALIBVS MORE MAIORVM
RITE CAPESSENDIS

D. XXVII. SEPTEMBR. CIOIOCCXXXV.

IN IVLEO MAIORI

HORIS ANTE ET POST MERIDIEM CONSVETIS
PVBLICAE ERVDITORVM DISQVISIONI SVBMITTIT
AVCTOR

CONRADVS DIETERICVS GVTIKE

KYRITZENSIS PRIGNITIVS.

HELMSTADII

TYPIS PAVLI DIETERICI SCHNORRII ACAD. TYPOGR.




Digitized by the Internet Archive
in 2026

https://archive.org/details/IA41385907_0124



DISSERTATIO INAUGURALIS MEDICA
DE
REGIMINE CAPITIS
PRAESERTIM QVOAD CALOREM
ET FRIGVS.

§. I.



uamquam cujuscunque partis in corpore humano artificiosæ actiones adorandam summi Numinis potentiam atque sapientiam luculentissime testentur : inter omnes alias tamen capitis functiones eminent ac dignae admiratione sunt. Easdem vero etiam pro vtilissimis maximeque necessariis iure meritoque habendas esse, omnia
A recte

recte reputanti facile adparet. Praesunt enim illarum aliquae motibus infinitis, omni momento ad vitae totiusque corporis conseruationem apte & homine inscio dirigendis. Aliae voluntati parent, & motus non minus innumeros ad eius nutum producunt momento citius: aliae corporis sui statum & corporum aliorum existentiam & proprietates homini manifestant: aliis denique motus illi maxime admirandi perficiuntur, quibus in hac animae & corporis societate opus est, vt illa sensuum internorum exercitium rite peragere queat. Inseruiunt illae omnes, exceptis primis, conseruando animae cum corpore commercio, vtque homo humanas actiones edere queat, faciunt.

§. II.

Sunt proinde etiam diuersa in capite organa, functionibus iis omnibus destinata, & artificio inexplicabili parata, & maiori, quam reliqua in corpore humano, fabrefacta. Vitae quidem & necessitatibus eius prospicit cerebellum, quod sub posterioribus cerebri lobis & in inferiori cranii parte situm, ex innumeris canaliculorum myriadibus conflatum, spiritus, vitales & naturales dictos, secretos, per neruos motu progressiuo ad partes omnes ablegat. Hoc vero mechanismo functiones memoratas praestari, confirmant varia experimenta adhuc in brutis instituta, nec non laesiones cerebello inflictas, item variae cerebri adfectiones morbosae.

§. III.

§. III.

Cerebrum vero in anteriori & superiori cranii parte situm, & duo quasi hemisphaeria repraesentans, eadem, qua cerebellum, sed uti e functionum eius magna diuersitate non frustra colligitur, longe magis admirabili vasorum compositione, formatum est. Secernuntur in eo spiritus animales, libero sensuum internorum ac externorum exercitio dicati, a neruis partim progressiuo motu ad omne corporis punctum deferendi, partim alio, omni conceptu celeriori, & a priori distinguendo, functionibus animae motibusque voluntariis famulantes. Hocce spirituum motu, quem tremulum Ill. Dn. PRAESES *) adpellauit, commercium animae cum corpore peragitur, qui in perceptionibus a neruorum extremitatibus ad commune sensorium propagatur; in motibus voluntariis autem a sensorio communi ad neruos, musculationum actionibus inseruientes.

§. IV.

Est ergo cerebrum propter hasce suas functiones nobilissima sine dubio pars totius corporis humani. Et si enim partes aliae quaedam magis ad vitam continuandam pertineant, & sine hac functionum in cerebro exercitium nullum sit: praestat tamen longe, hominem adultum eas actiones edere, quibus praecipue inter homines refertur, quam vitam qualemcunque viuere. Intelligitur inde facile, quanta cura inter multos alios prouidendum habe-

A 2

ant

*) Vid. eius Dissert. singularia quaedam de sensibus externis exhibentem.

ant eruditi, qui solo, & alii, qui qualicumque ingenio viuunt, vt cerebrum cum omnibus eius functionibus recte se habeant. Potest sane, quod omnes optandum habent, mens sana esse saepe in reliquo corpore vtcunque adfecto. Aegre vero & raro sana illa degit in cerebro male constituto, neutiquam autem, si in hoc vitium quoddam grauius haeret. Nec raro accidit, vt a levi quadam cerebri perturbatione e composito alias statu suo deiiciatur, neque meditationes recte succedant, voluntas vero contra sapientiae regulas decernat. Cum tamen sine vita functiones animales exerceri nequeant, & illa a cerebello maxime dependeat, ceu a quo cor ipsum ad motus suos instituendos impellitur: manifestum ex vtraque ratione fit, quanti referat, partes has sub cranio latentes recte se habere, seu, vt Germani loquantur: hominem sub pileo recte compositum esse.

§. V.

Sed aliae adhuc maxime nobiles aequae ac necessariae capitis functiones adtentionem merentur. In ambitu enim eius & circa eum incipiunt & determinantur quatuor praestantissimi e sensibus externis. Quintum vero, seu tactum cum reliquis corporis partibus communem habet. Instructum proinde est caput organis quatuor singularibus, quae ab usu suo, *visus*, *auditus*, *gustus* & *olfactus organa dicuntur*, & mirabili artificio fabrefacta sunt. Si stant ea nobis corporum externorum adfectiones, dum motus tremuli, in illorum neruis ab obiectis excitati, ad sensorium commune in medullari cerebri

bri substantia propagantur; & pro eorum diuersitate perceptiones, quas producunt, maxime differunt. *Visus* enim nobis radiorum luminis interuentu corporum magnitudines, figuras, situs, motus & colores delineat; *auditus* aëris motum tremulum ac similem illi, a quo propagatus fuit, sub soni idea nobis sistit. *Olfactus* spirituosa alcalina & oleosa volatilia sub singulari aliqua grata vel ingrata idea; *gustus* spirituosa & salina sub varia acidi, amari, dulcis, austeri idea nobis sistit. Excitatur hic in lingua; quae praeter hunc & varios alios vsus, eum adhuc praecipuum habet, vt articulata voce animi nostri sensa cum aliis communicare queamus: quamuis ei rei plures adhuc aliæ partes inseruiant.

§. VI.

Patet iam magis adtendenti ad excellentes hasce functiones, omnium interesse hominum, eruditorum maxime, caput incolume semper conseruare atque omnibus functionibus, huc usque commemoratis, probe aptum. Qualis enim cerebri, cerebelli nec non reliquorum capitis organorum status est, tales functiones illarum partium, inde dependentes,prehenduntur. Testatur praeterea quotidiana experientia, cum ratione conspirans, capite, adfectibus etiam leuioribus, multo vero magis grauioribus, laborante, omnes corporis partes, aliquas vero singulari praeterea modo, facile in consensum trahi, earumque functiones mirandum saepe in modum turbari atque laedi posse. Docet vtraque functiones vicissim animales, morbo fere quocunque reliquum

A 3

corpus

corpus adfligente, ita saepius labefactari, vt omnes meditationes difficulter, aut prorsus non procedant.

§. VII.

Curae igitur pretium, circumspectis his omnibus, esse existimaui, de REGIMINE CAPITIS in praesenti Dissertatione tractare; vtpote quo probe obseruato, varios morbos auertere, omnium capitis functionum aliarumque ab his dependentium vigorem atque incolumitatem conseruare ac promovere poterimus. Tractabimus autem iam nunc tantum quasdam maxime obuias & semper varia ratione caput adficientes causas, calorem scilicet & frigus, humiditatem & siccitatem cum paucis aliis.

§. VIII.

Considerandum ergo ante omnia est, quasnam hae causae (§. VII.) adductae, mutationes in solidis, fibris nimirum, membranis & vasis nec non in humoribus nostris producere queant & soleant. Solida e particulis terreis, pauci olei interventu, coagmentata & vi elastica praedita, varie ratione cohaesionis mutari possunt. Quale quid etiam humoribus, sanguini praesertim, humori, ex solidis & fluidis composito, & cuius particulae diuersae inter se vi non admodum magna cohaerent, accidere potest. *Calor* in fibris, & ex iis conflatis membranis & vasis, partibusque maioribus, cohaesionem minorem facit, elasticitatem hinc imminuit, partibusque debilitatem & laxitatem conciliat; omnes humores rarefacit, elasticitatem, secus ac in solidis fit, auget, fluidissima laticis

laticis vitalis dissipat, particulasque crassiores, lentiores, salinas, fixiores, oleosas tenaces coaceruando, haud raro periculosas obstructions & inflammationes facit. *Frigus* cohaesionem maiorem reddit, fibras membranarum & vasorum adcurtando, densando, roborando; atque sic actionem earum in fluida auget; vasorum etiam amplitudinem minorem facit; crassiores humorum particulas magis compingit & elaterem eorum minuit, omnique hac ratione obstructionibus ansam suppeditat. *Humiditas* eadem fere, ac calor, producit effecta. Laxat & debilitat fibras ac proinde earum elaterem tollit: sed poros praeterea in cute obstruendo perspirationem Sanctorianam turbat & ita humorum in corpore copiam auget. *Siccitatis* denique effectus sunt, fibras roborare, arctare atque elasticitatem augere, humidissima abripere, crassiores autem partes densare atque circulationi minus aptos reddere. Quod si quaedam ex his concurrunt, e.g. calor & humiditas, multo grauiora enascuntur mala, fitque tunc cohaesio longe minor, materia scilicet calorifica & aqua simul contactum impredientibus. Si autem frigus iungantur & siccitas, cohaesio & inde resultans elasticitas valde augentur, neutro fluido illas impediende *)

§. IX.

Nullas vero corporis humani partes a calore, frigore, humiditate & siccitate adfici magis posse atque debere, quam cerebri & cerebelli substantiam, vtriusque tenerrimam fabricam respicienti patebit;

*) v. Celeber. PRAES. Dissert. de ratione valetudinis & praesidiis autumno.

bit. *Calor nimius* membranas harum partium, vasa sanguifera & propria medullosa resoluit: hinc ab eadem caussa rarefactus sanguis versus interiora capitis ruit, stagnat, vasa nimis in iis distendit, arterias praesertim, naturaliter minus munitas, quam in aliis locis, & liquidissimis partibus calore abreptis. Plurimum autem sine dubio in spirituum motu omni turbat. Ab *humiditate*, corpori quocunque modo adplicata, eadem fere propter imminutam cohaesionem in substantia, vasis & membranis cerebri & cerebelli proueniunt mutationes. Sed ob denegatam perspirationem humores, in corpore ad accumulati, meningum & alia capitis vasa magis adhuc distendunt & cerebro molesti sunt. Vnde segnis & inordinatus spirituum in eo motus; & segne sensuum omnium exercitium. *Frigus* non admodum magnum vt corpus uniuersum, ita & caput robustius facit. Reliquae in capite mutationes, inde productae, multum differunt: prouti illud interim habetur, & vita hominis reliqua est. Maius si sit, humores praesertim serosos in membrana Schneideriana, oculis, auribus & capitis integumentis coactos, detinet, paulatim etiam in illius interioribus, per se frigidioribus, quam aliae corporis partes molles sunt. Idem spirituum motus fere sistit, & per canales medullares cerebri constrictos ægre progredi finit. *Siccitas* tum reliquo corpori, tum maxime capiti admodum conueniens est, & raro nocet, etiam maior, nisi valde diuturna sit. Tunc enim sanguinem, exhausto liquidissimo, in partibus, quas sub frigore nominaui, densat nimis, acres reddit, detinet,

tinet, & exhalationem vaporum, illis humectandis necessariorum, impedit. Quae saepe origo morborum capitis valde acutorum est. Saepius tamen adiuncto calore, interdum etiam frigore, nocet.

§. X.

Cum interfit vitae & actionum eius plurimum, spiritus omnes in cerebro & cerebello continue & aequabiliter secerni, tum etiam per canales medullares illarum partium & neruorum ea ratione promoueri; motum vero spirituum tremulum inter eorum canalium initia & extrema non turbari: haec vero omnia varie a sanguinis motu versus encephalon valde inaequali impediri queant: iuuat nunc, paucis ad naturae solertiam adtendere, qua illis impedimentis obuiam iuit.

§. XI.

Arteriae, quae cerebro & cerebello prospiciunt, sanguinem, pro spirituum maxime secretionem, eis adducentes, quatuor sunt, carotides duae & duae vertebrales. Carotides ex inflexa aorta prodeuntes recta adscendunt trunco singulari ac indiuiduo, fere iuxta vtrumque asperae arteriae latus per collum, atque prope tertiam eius vertebam in duos explicantur ramos; quorum alter in vtroque latere sub nomine carotidis internae caluariae penetralia ingreditur; alter vero, carotis externa dictus, ad capitis partes exteriores progreditur. Simulatque processum styloideum adtigerunt internae carotides, paululum bis incuruatae, per octauum foramen, osi cuneiformi ad canalis modum insculptum, membra-

nam a dura matre mutuantes, caluariam ingrediuntur; quam vero, simulatque ex hoc canale egressae sunt, statim deponunt, & sub dura matre prorepantes versus posteriorem processum sellae turcicae adscendunt; mox vero aliquo modo intortae ad latera ephippii rursus descendunt; postea vero paululum incurvatae adscendentes, duram menynghem ad latera infundibuli perforant, versus piam matrem & cerebrum deriuntur, atque pluribus propaginibus mire hinc inde intortis ipsis prospiciunt. (*) Arteriae autem vertebrales, ex subclaviis oriundae, perpendiculari fere adscensu per foramina processuum lateraliū vertebrarum colli feruntur. Quam primum epistrophaeum adtingunt, (**) corpori eiusdem trium vel quatuor linearum profunditate inseruntur; ex quo tandem normali directione per canalem, vtrique processui transversali huius vertebrae insculptum, regressae, processus Atlantis transversos transeunt, atque per magnum occipitis foramen miris flexibus (*) cranium ingrediuntur; deinde, vna cervicali arteria constituta, carotidibus per anastomoses iunctae mireque implicatae, largiter per cerebellum & cerebrum disseminantur, ubique vero carotidum ramu-

(*) Willis. Anat. cerebri cap. VIII. Ridley Anatom. cerebri cap. III. IV. Minorem eius ramum, qui per foramen decimum caluariam intrat, nunc omitto; de quo v. d. Spigel. Anat. I. VI. cap. 2. & Ridley cap. 3. qui a nemine ante se visum eum, sed falso, dicit.

(**) vid. Nicolai Diss. de directione vasorum Argentorati 1725. habitam p. 9.

(*) conf. Illustr. & celeberr. Heisteri, Praeceptoris mei & Patroni aeternum suspiciendi comp. Anat. §. 272. & §. 293. cum Not. 66.

ramulis occurrentes & anastomosibus vnitae. Vltiorem carotidum & vertebralium decursum qui nosse desiderat, adeat WILLISIVM, VIEVSSENIVM & RIDLEY.

§. XIII.

Testantur hæc (§.XI.) naturam de directione vasorum ad caput pertinentium, quam rudi admodum penicillo delineare tentauimus, maxime sollicitam fuisse. Rite enim circumspectis omnibus, patet, singularem hancce vasorum distributionem & inclinationes ad promouendam æquabilem sanguinis circulationem, nec non ad auertendum omnem eius impetum a cerebro egregie inferuire. Videtur autem hæc vasorum incuruatio præcipuam continere rationem, cur sanguis sub vario statu & positu corporis non nimia copia & impetu, & æquabilius, quam si recta via eo propelleretur, feratur. Inuenit enim in quouis inflexionis puncto vtriusque arteriae, ad cerebrum tendentis, sanguis nouam resistantiam, atque in motu suo quidpiam retardatur. Idem alia ratione contingit in mutuo concursu sanguinis, per carotidis ramos versus ceruicalem arteriam progredientis, & in vltimis vtriusque arteriae ramulis.

§. XIII.

Fit eõ artificio, vt vasa sanguinem e cranio reuentientia commode id facere queant; dum eum paulatim ab arteriis accipiunt. Est vero in illis quoque singularis fabrica adtendenda. Non enim hic, vt alibi fit, venulae eum maioribus venis tradunt,

sed diuersis vasis, quae sinus vocant. Locati eorum sunt in cerebro quatuor notabiliores, (decem in genere, vel vndecim alii numerant) triangulari figura, intra durae matris duplicaturam, sanguinemque receptum ad venas iugulares internas partim, partim ad vertebrales venas, vtrimque vero tandem ad venas subclauias, cauam & cor reducunt. Ne a sanguine nimis distenti, quod venis alibi saepe accidit, cerebrum comprimant, robustam tunicam habent, & transuersis ligamentis intra cauitates eorum cautum est. An sub impetuoso sanguinis ad encephalon fluxu carotides arteriae partem eius sinubus & receptaculis durae matris, quæ minores quasi sinus sunt in basi cranii, tradant, ne ipsae quoque nimis dilatentur, in magno Auctorum adhuc dissensu, vltioribus experimentis dirimendum erit. Sinus autem laterales, antequam iugularibus venis sanguinem tradant, in amplos specus expanduntur, vti etiam vertebrales venae, antequam a iugularibus partem sanguinis accipiant; vt a capitis interioribus nimis impetuose interdum recurrens, spatium, vbi secedat, reperiatur, neque secuturum porro diutius in capite retineat. Quod porro ne fieret, ita prospexit natura, vt in egressu venarum ex cranio arteriae his haud adiaceant, sed vtraeque foraminibus distinctis egrediantur: quae si coniunctim per foramina cranio in sculpta transirent, periculum sane foret, ne dilatatione & motu arteriarum vasa venosa, in canali osseo cedere nescia, valde comprimerentur, atque aequabilis & liber sanguinis e cerebro & cerebello egressus impediretur.

§. XIV.

Duorum adhuc mentionem iniiciam, cum omnia huc pertinentia memorare iam non liceat. Est in coalitu vtriusque arteriae vertebralis spinalis arteria, quae per totam spinam descendit. Ruit huc, dum praesertim caput erectum est, proprio pondere non pauca sanguinis pars, ad cerebrum forte nimia vi aut copia propulsi. Altera observatio est, quod nulla humani corporis pars mollis paucioribus vasis sanguiferis instructa adpareat, quam medullaris cerebri & cerebelli substantia. Quae in ea deprehenduntur, in ambitu maxime posita sunt, vti in exteriori sub cortice cerebri arteriae quaedam non admodum magnae; (*) & in ventriculis duobus maioribus plexus choroideus, ex arteriis & venis contextus; & glandulae pituitariae adiacens exiguum in homine rete mirabile.

§. XV.

Docent haec omnia, (§. XI. - XIV.) quomodo cautum sit, vt, quod antea indicaui, (§. X.) spirituum secretio & motus in cerebro & cerebello aequali ratione contingant. Docent in primis paulo ante dicta, (§. XIV.) & sinuum positus extra limites vtriusque partis, quam studiose natura calorem omnem paulo maiorem a medullari substantia arceri voluerit: ne, vt videtur, medullarium tubulorum robur labefactaretur, nec spirituum internus motus a caloris materia turbaretur, nec forte illorum crasis nimis mutaretur. Ne tamen frigidis illis partibus calor omnis deficeret, in ambitu illorum tantum il-

B 3

lius

lius concessit, quantum pro mediocri fotu satis esse poterat.

§. XVI.

Quam autem egregie his rebus vasorum sanguiferorum in capite fabrica & distributione a natura prospectum sit: varia tamen sunt, quae ut alia, ita haec eius consilia turbare valent. Sic notum est, a plethora omnia corporis vasa distendi. Tantum autem abest, ut cerebri & cerebelli vasa excipiantur, ut potius haec praecipue inde adfici crediderim. Sunt enim utriusque vasa, sanguifera praesertim, reliquis corporis humani multo subtiliora atque tenuiora, nec ambientium partium renixu sic, uti alibi coercita, humores tam expedite promouent. Quare adeumulati hi in plethora, vasa & membranas distendunt, & subiectas partes, exeuntesque in primis e cerebro nervos vario cum effectu premunt. Multo vero grauiora enascuntur mala, si idem abundans sanguis calore rarefit; quod illi prae sanguine aliarum partium facilius eam ob causam accidere credibile est; quia subtilior ex aorta sursum magis, quam deorsum rapitur; eumque spirituum secretio requirit. Solet vero talis rarefactioni magis, quam crassus opportunus esse. In hoc ergo casu cum maxima vasorum contingat distentio; inde porro insignes cerebri & cerebelli oriantur compressiones: fieri non potest, quin liberum sensuum internorum atque externorum, nec non actionum voluntariarum atque inuoluntariarum exercitium maxime mutetur, labefactetur atque interdum prorsus plus

plus minusue sufflaminetur. Grauiissimi vero & saepe lethales sequuntur effectus, si sanguinis arteriosi & ebullientis extra vasa fiat eruptio, & apoplexiam producat: quod in senibus, & iis, qui ex aliis causis caput debilitatum habent, haud infrequenter contingere obseruatur.

§. XVII.

Non immerito inter eas causas, quas supraratusui, (§. IX.) caloris praecipuam quandam hic rationem esse existimaui. Nullam enim vero ex illis in corpus humanum functiones animales magis labefactare posse, quam calorem, siue is externus corpori applicetur, siue interius in corpore excitatus sit, cuius effectus a calore oriundos (§. VIII. & IX.) descriptos consideranti haud difficile iudicare licet. Quare etiam obseruamus, in hominibus ceterum sanissimis a solo calore paulo maiori cogitationes & meditationes statim turbari atque difficulter procedere. Sunt alii homines, qui, simulatque caput siue solari, siue cuicunque calori exponunt, intensissimis mox excruciantur doloribus, vertigine aliisque malis. Adparet autem caloris effectus praecipue diebus canicularibus, ubi tantae saepe spirituum ab eo commotiones exoriuntur, ut multa animalia, praesertim canes, vulpes & lupi in furorem agantur & rabida fiant; quale quid interdum hominibus quibusdam ipsis contingit.

§. XVIII.

Frigoris temperati e contrario vtilitatem jam supra (§. IX.) adtigi, & porro e §. VIII. intelligere licet. Roborat ergo solida omnia; quod robur omnibus vasis, praecipue medullaribus in cerebro & cerebel-

rebello necessarium est. Idem humores temperate densat, per vasa promouet, actione horum adtritum in illis auget, & transpirationem rite moderat. Quare sub illo spirituum bonorum secretio & motus omnes quam optime fiunt, & minimum turbantur. Quae inter alias magna ratio est, quare matutino tempore, vere & autumnino, si modo haec anni tempora tempestates non nimis, nec diu pluuiosas aut saepius mutabiles habent, cogitationes & meditationes optime succedant, aestate vero in locis mediocriter vmbrosis, non tamen simul multo vapore repletis.

§. XIX.

Quae tamen ab excedente frigore mala produci queant ac soleant, supra (§. IX.) memorata quoque docere queunt, & experientia testatur. Prima fere in capite sunt grauedines, coryzae, cephalaeae, hemi-craniae, clauī, extra cranium adhuc haerentia; mox iidem dolores, sed intimiora occupantes. Quod si sanum corpus saeuiori frigori hyemali diutius exponatur, statim in eo segnities ad functiones omnes peragendas oritur, torpor praecipue in functionibus animalibus, & stupor; donec illae paulatim omnes, & tandem reliquae cunctae cum vita cessent.

§. XX.

De humiditatis & siccitatis effectis in capite supra dictis, (§. IX.) multa nunc non addam. Prior, quamuis exterius illi adplicata ad capitis interiora non facile penetret, in exteriora tamen in superiori parte sensibilius agit, & propter connexionem pericranii

crânii cum dura matre, & neruorum in omnibus eius integumentis cum interioribus consensum magnum, illas partes relaxando, has quoque saepe non parum adficit; tum transpirationem tam in reliquo corpore, quam in capite, valde impediendo, incommoda in eo augeat. Quare sub aëris constitutione humida, si paulo diutius haec protrahatur, minus fere alacres homines obseruantur ad obeundas functiones animales, & tandem in tristitiam proniores sunt: in dispositis vero morbi, quales sub frigore recensui, (§. XIX.) facile oriuntur.

§. XXI.

Non patitur limes scripturae huic praefixus, caussarum, de quibus haecenus egimus, vim, si illae intra corpus humanum enatae sunt, examinare. Longum id foret, & ad morborum genus omne nos deduceret. Direximus ergo nunc curam nostram ad illos effectus, quos exterius & capiti ipsi praesertim adplicatae producant: ut, cum ita semper varia ratione quibuscunque hominibus adplicentur, repერიamus, quomodo sanos agere & cauere oporteat, ne iniuriam inde quandam accipiant, sed ut functionibus suis recte exercendis integrum caput semper contra harum caussarum vim conseruent.

§. XXII.

Adparet autem rem omnem hanc reputanti statim, aliis regulis opus esse Romae, aliis in Ægypto, aliis in Germania, aliis denique in Islandia: aliter quoque formandum & custodiendum esse caput

put Martis filiorum vel agricolæ, aliter eorum, qui Mineruae castra sequuntur. Recte cum iis agitur, qui vitae generi vtrique priori destinantur, si capita eorum mature frigus, calorem, humidum, siccumue aërem, prouti ea contingunt, ferre adsuefiunt; vt firma reddantur, nec postea diuersitatem illorum & incommoda inde valde sentiant. Sed alia eruditorum ratio est. Interim cum infantum & puerorum corpora omni vitae generi, quantum fieri potest, recte adaptentur, cum futura non semper in parentum manu posita sit: & robustum caput non modo nulli noceat, sed etiam morbis minus sit opportunum; tandemque in prima aetate machina tenera corporis magis formanda, quam animus multum fingendus sit: non dubito hanc generalem regulam inde deducere: *caput infantum mature cuicunque aëris vicissitudini adsuefaciendum & veste non multa, sæpe nulla muniendum esse.* Valere autem simul hic, quod in omni vita, & in obseruatione secuturarum regularum debet, *ne quid nimis.*

§. XXIII.

Ab illo tempore, quo litterarum studia quis agitare paulo magis incipit, & deinceps, praeostat caput nulli causarum memoratarum actioni nimium, vel diutius exponere; saltim, dum animus in meditationibus versatur, vel ad has se accingere vult. Nondum ea Hyperboreae gentes adhuc ediderunt specimina, vt frigus fauere ingeniis humanis nobis persuadeant: neque in Germania nostra sub Ioue frigido, vel nebuloso multorum ingenia

nia probos foetus edere existimo. Feliciora semper ingenia Asia, quam Scythia, aluit, tumidiora tamen non nihil simul, & ipsa Africa, aliquanto sicciior illa: quamuis, an intra tropicos bonae frugis multum ab ingeniis producat, dicere nunc non possum.

§. XXIV.

Excitat ergo calor mentem, & prius torpentes forte spiritus animales, horumque motum intestinum sustinet. Quare etiam idem aliquanto maior plus eruditi capiti vtilitatis & commoditatis adfert, quam frigus paulo asperius. Linea, quæ vtrumque recte determinat, ita, vt arbitror, optime semper definitur, sub qua neutrius perceptio notabilis sit. Extra meditationum tempus vel frigus, vel calor capiti magis conuenire potest, pro reliqua eius constitutione; saepius tamen frigus, vt illud roboretur iterum.

§. XXV.

Apud nos itaque æstate calor, quem conclauia, aut alia loca, soli non nimis exposita, habent, hyeme mediocris, & ad similem fere gradum in illis excitatus, capiti sufficere potest. Illum, quem camini exhibent, nec reliquo corpori, nec capiti præcipue proficuum iudicare queo. Vt voluptatis gratia se iis commendat, qui corporis sui partes successiue calori frigoriue obicere amant, & tabaci fumum mox a conclauis fugare cupiunt: ita successiua, subita & constans illa solidorum & fluidorum in humano corpore a frigore & calore (vid. §. VIII.

& IX.) mutatio non potest non damnum ei paulatim ingens adferre; praesertim cum frigidus aër, quotiescunque conclaue aperitur, vehementi vi in hoc irruens, corpus adhuc sensibilius adficiat. Quare non infrequens obseruatio est, homines hoc caloris genere multum vtentes, malis §. XIX. ab initio recensitis, aliisue saepius vrgeri. Sed vt alii mutationes illas ferre queant; meditaturis auctor esse velim, vt eas vitent.

§. XXVI.

Est vero nunc in primis de capitis velamentis dicendum: quæ sine dubio corpora & vitae genera diuersa in eadem regione diuersa requirere queunt. Fuit is sine dubio error grauis Patrum & Auorum nostrorum tempore, quod viri, partim capillis adscitiis, faciem fere omnem, & vltra dimidiam thoracis partem abscondentibus; alii multis pellibus; feminae vero aliis velamentis multis, & numerosae nunc familiae sufficientibus, caput vel ad tutamen, vel ad decus onerandum putabant. Correxerunt errorem eum annis abhinc multis regulae de symmetria melius expositae & cognitae: quamuis medici dudum machinarum illarum ingentium vsu dissuadere debuissent. Sed restitat alius error, priori, vt arbitror, antiquior, quo plures ad probe excalescitum etiam fornacem, & noctu in mediis plumis quasi sepulti, caput crassis integumentis e plumis, pellibus, aliisue rebus constructis, involuunt: vt contra frigus id optime defendant. Possunt sane eaamenta quibusdam necessaria facere varii status, tum

corpo-

corporis sui, tum aëris; nec eis adsueto consilium dare velim, vt eadem statim abiiciat. Sanitati tamen magis prodesse statuo, iis non adsuetsci: sin factum hoc sit, proximum, eam consuetudinem paulatim emendare.

§. XXVII.

Rapiuntur enim sub eorum vsu, vti in alio fotu solent, humores copiosius versus caput, coaceruantur ibi, & omnia ea patrant, quae (§ VIII. IX. XVI.) memorauim. Exhalantur vapores copiosi sub iis integumentis, sed paulatim maiori copia ibi collecti, secuturos reprimunt: quare coaceruati iam intra cranium valde augentur. Videmus hinc, ita agere adfuetos frequenter capitis doloribus, catarrhis, aurium & oculorum adfectibus variis vexari, vertigini obnoxios esse, & caput paulatim ad apoplexiam disponere: qua tandem saepe subito corripitur solent, si praesertim humoribus inebriantibus multis affluxum sanguinis versus caput & aestum in illo auxerint; hisque omnibus frigus magnum, illico superveniens, tum reliquos humores intimiora versus retropellat, tum adcumulatos ita omni ratione in cerebri vasis cohibeat; vel fibrarum omnium vi aucta partem inde exprimat.

§. XXVIII.

Non finit locus hic exponere vitia omnia, quae a tali sinistro capitis regimine in hoc produci soleant; si maxime, vt modo dixi, inebriantium potuum vsus multus accesserit. Paucis tamen hic notandum est, pertinere huc varias & turpes saepe in faciei cu-

te defoedationes & erysipelas. Et vero simile mihi videtur, non frequentiore habere originem plicam, quæ Polonos adeo molestat: etsi paulatim haereditaria dispositione inuitari, vel excitari malum hoc magis potuerit.

§. XXIX.

Videtur ergo optimum consilium, caput a teneris annis frigori medioeri semper adsuafacere: ob eam etiam causam, ne illud calori nimis adsuatum, nimis a frigore mutetur; si huic, quod multa saepe postulant, exponendum est. In loco temperato satis est, veste leui, nec integrum idem velare. Praestat autem modis multis, hyeme, calore hypocausti moderato illud a frigore defendere, quam multis velamentis: sub quo regimine humores ad caput rapiuntur, & transpiratio per omne corpus non rite procedit. Quem velandi modum ne dormientibus quidem in conclauis frigido proficuum esse iudico. Modice ergo hyeme caput in lecto tegatur, aestate minus adhuc; tempore omni in puluinari eleuetur, nec facies integra intra lectum abscondatur.

§. XXX.

Longius adhuc processit CELSVS (*) quando in eo loco, ubi capite infirmis regulas praescribit, has addit: *Capiti nihil aequae prodest, atque aqua frigida. Itaque is, cui hoc infirmum est, per aestatem id bene largo canali quotidie debet aliquamdiu subiicere. Semper autem*

(*) Libr. I. de Medicina cap. 4.

autem, etiamsi sine balneo vnctus est, neque totum corpus refrigerari sustinet, caput tamen aqua frigida perfundere. Verum vero & vtilissimum id consilium est. Qui tamen prior adparatus si forte minus placeat, expediet certe, caput aestate saepius frigida aqua perfundere. Magis temerarium adhuc multis videtur consilium, quod paulo post CELSVS (*) subiicit: *neque vero his solis, quos capitis imbecillitas torquet, & us aquae frigidae prodest: sed iis etiam, quos assiduae lippitudines, grauedines, destillationes, tonsillaeque malae habent. His autem non caput tantum quotidie perfundendum, sed os quoque multa frigida aqua fouendum est: praecipueque omnibus, quibus hoc utile auxilium est, eo vtendum est, vbi grauius coelum Austri reddiderunt.* Est vero nec hoc contemnendum; cum eo tamen, ne tunc illa fiant, quando mala memorata iam adfligunt; vtque post eum vsum caput probe detergatur, quo minus humiditate sua noceat. (§. IX.)

§. XXXI.

Non adeo etiam infrequentes obseruationes docent, & aegros interno & externo capitis aestu vexatos huiusque tandem inpatientes, remedium sibi in frigore quaesuisse & inuenisse. Memorat tale exemplum MAYERNE, (**) vbi aeger, rebeli capitis dolore conflictatus, linteum aqua frigidissima imbutum, toti caluariae repetitis vicibus adplicauit, eoque remedio sanatus fuit. Quod ob cautelam, ab
Au-

(*) cap. 5.

(**) Prax. Med. L. I. cap. 8.

Auctore additam, prae multis aliis adlego. *Credo*, inquit mox, *oportere caute eo uti, metu nimiae refrigerationis cerebri, a qua coma, lethargus, paralysis impendere possunt.* Sed uti metum eum non semper inanem puto, in senibus praesertim aliquibus & frigidioribus hominibus: ita plures existere casus queunt, ubi, si nimium humores calidiores, versus caput ruentes, iis, aliisue malis originem praebent, frigidus vel aër, vel humor capiti adplicatus, eadem auertere, vel tollere valet. Fuerunt ergo iam veteribus in usu, & a GALENO commendantur in doloribus capitis, (*) in phrenitide & comate (**) frigus, frigidae perfusiones capitis ex papauerum capitibus & ex alto, ac infusiones ex oxyrhodino. Proximo autem abhinc saeculo Medicus in Anglia celeberrimus, THOMAS SYDENHAM, non aliis magis remediis contra phrenitidem et comata, tum in febre illa nova, quam ab hoc symptomate comatosam adpellavit, (***) tum in alia, peripneumoniae nothae specie, (*), in variolis, (**) inque aliis febribus continuis, (***) pugnauit, quam capitis refrigeratione, facta interdum quoque rasura capillitii, & positu illius elatiori; idque adeo feliciter cum successu, ut praestantissimi quique Medici vestigiis eius in hac quoque re insistere non dubitauerint.

§. XXXII.

(*) Vid. de remediis facile parabilibus cap. I.

(**) Meth. medend. libr. XIII. cap. 21. 22.

(***) Vid. Ann. 1673.-75. cap. 2. oper. Tom. I. p. 136.

(*) Vid. eius schedul. monitor. Tom. II. p. 517.

(**) Tom. I. p. 79. seqq.

(***) p. 29. seqq.

§. XXXII.

Quibus caput iusto humidius est, iis aërem humidiores, nebulosum ac pluuiosum vitandum esse, facile adparet. Ad hos etiam in primis pertinet illud CELSI consilium: (*) *habitare adificio lucido, perflatum æstium, bibernum solem habente: cauere meridianum solem, matutinum & vespertinum frigus; itemque auras fluminum atque stagnorum; minimeque nubilo cælo soli aperienti se committere, ne modo frigus, modo calor moueat: quæ res maxime grauedines destillationesque, concitat.* Iisdem quoque interdicendus est somnus multus, in quo humores ad caput copiosius deriuantur, præsertim diurnus, maxime autem meridianus. Vtile valde est, capillos frequenter ad cutem refecare, tum frictione moderate vti sæpius, præsertim mane, adiuuandæ perspirationi; capillos potius adscititios, quam proprios gestare, vt sudor a motu corporis, vel aliter interdum prouocatus abstergeri melius queat, nec cutem statim nimis relaxet, mox frigidus factus constringat, poros obstruendo transpirationi officiat, & molestam in capite sensationem producat: si vero propriis vti quis malit, frequenter eos pectere, vt vapores sub iis collectos abigat, & motus vibratorios ita in cute augendo transpirationem promoueat. Sed, seu propriis, seu alienis vtatur capillis, conuenit, nudum sæpius caput aëri, sed huic puro, sicco, non valde frigido, interdum etiam paulo calidiori exponere. Quæ tamen omnia validiora multum erunt ad detonsi, quam ad capillati caput roborandum, superfluosque humores huic auferendos. Secundum

D

vete-

(*) Libr. I. cap. 2.

veterum instituta humida capita quoque oleo interdum fouenda forent, cui ex Galeni(*) praescripto acetum non nihil adiectum sit. Sed recte illae capitibus inunctiones, veteribus non Medicis magis, quam multis aliis olim adeo adamatae,**) nunc in Medicina exsulant, vel raro reuocantur; siquidem cutis poros obstruendo, perspirationi nimis obsunt, simulque, si calidiora olea adhibeantur, novos ad caput humores nimis inuitant. Erit vero talibus capitibus conuenientius, cum frictione interdum vel vinum, vel vini spiritum exterius adhibere.

§. XXXIII.

Siccitatem raro capiti nocere, supra (§. IX.) monui. Si vero intense sicca tempora sunt, (ἐν τοῖσιν ἀνχμοῖσι) febres acutas fieri HIPPOCRATES iam obseruauit. (***) Est inter has, vel cum his, frequens insania. Addit CELSUS lippitudines, (*) seu ophthalmias. Et addi praeterea queunt otalgiae. Mala autem nunc capitibus tantum adlego, quorum rationes iam adduxi. (§. IX). Solent autem eadem facile oriri, si tempestas simul valde calida, qualem Hippocrates subintellexit, vel frigida sit; & alio quoque tempore in iis, quibus capita valde sicca sunt, nisi siccitatem eam temperent interdum. Quod, praesertim ἐν τοῖσιν ἀνχμοῖσι vel sola aqua, ore frequenter detenta, vltius in corpus admissa, vel vaporis frigidi forma capiti adpli-

(*) De remediis facile parabilibus cap. I.

(**) de quibus vid. Celsus passim, Mercurialis de arte gymnastica. L. I.

C. 8 Sacerdotum Elæochrismaton Myrothecium. I. C. 16. §qq.

(***) Sect. III. Aphor. 7.


(*) Libr. II. c. I.

plicata, iis facere licebit; quos ceterum hoc ab omni re, quae aestum in eo facile prouocat, defendendum, solemque in primis vitandum habere, rationes expositae (§. IX.) docent.

§. XXXIV.

Proposui praecipuas quasdam regulas, quibus organon illud nobilissimum, functiones omnes regens, & pro cuius statu animales in primis succedunt, integrum saluumque conseruari potest: vt reliquo corpori profit & animae recte inseruiat. Praemisi illis de organi ipsius ratione expositionem, qualis instituto meo sufficere poterat: vt inde rationes illarum regularum intelligerentur. Quas ceterum frequens & sollicita multorum medicorum satis confirmavit obseruatio, & omnes propriis etiam exemplis, partim adhuc viuis, non paucis illustrauit Celeber. Dn. PRAESES in praelectionionibus suis publicis in elegantissimi scriptoris A. CORN. CELSI libros priores de Medicina. Quae mihi ansam dederunt in hanc rem, litterarum studiosis maxime vtilem, curiosius inquirendi. Restat nunc ea consilia agitare, quibus mens recte dirigatur: ne quid in suo domicilio turbet, sed recte & commode semper eo, seu hospitio, seu organo uti queat. Vt enim plurima illorum & valde vtilia omnibus suppeditent Philosophi: ita multa iis adhuc addere Medicinae potest, e proprio penu desumenda. Sed hanc rem iam non ago; habeboque satis, si priora illa destinata mea perficiendo, lectori studium meum adprobauero.

F I N I S.



NOBILISSIMO ATQVE CLARISSIMO
CANDIDATO SVO
S. P. D.
PRAESES.



Non inscite Galenus tum empiricos, tum
eos, qui falsæ theoriæ curandi metho-
dum aptant, ut passim, ita in illo lo-
co, qui in dissertatione ΤΥΔ e libro
XIII. methodi medendi allegatus est,
exagitat. Differit ibi de applicatione
oxyrhodini in phrenitico malo, quod omnes Medicos ca-
piti admovere dicit. Quærit ergo, an prudenti consilio
omnes id faciant, & sic disputat: Empiricus namque
ab experientia se ait ejusmodi medicamentorum na-
ctus inventionem. Qui autem & hanc vituperat, &
inquisitionem de actionibus refugit, huic unde, quæ-
so, succurrit, ut pro thorace caput in phreniticis ma-
defacere eligat? Ceterum hoc ipsum oxyrhodinum,
quod capiti phreniticorum applicamus, ceu quidam
ex amicis dicere solebat, non solum amethodos i-
stos Thessali sectatores, sed etiam reliquos manife-
ste redarguit universos, quicunque principem animi
partem in corde statuunt. Nam cum aliquando vi-
dissem quendam ex Athenæi discipulis caput aceto &
oleo mistis perfundentem, prohibui: jussique pectori
admovere id remedium. Quippe læsam in delirio esse
partem principem: eam autem esse autorem Athenæo
in corde: itaque non recte relicto pectore caput eum,
integrum præsertim membrum vexare, eique nego-
tium

tium facessere, nunc oxyrhodinum infundendo, nunc radendo, tum spondylium, aut serpillum, aut id genus aliquid admovendo, imo vero, si malum traheret, etiam castoreum, aut certe etiam cucurbitam. Quippe id esse persimile, ac si, cui in femore phlegmone sit, calcaneo remedium applicet. *Absurdum hoc esse, clamabunt statim omnes: si de malo idiopathico in sede sua aggrediendo questio sit. Quare etiam Galenus paulo ante monuerat, fieri sane posse, ut corde etiam affecto phreniticus quis efficiatur. Sed quæ frequentior adhuc usque diem in morborum curationibus luditur fabula, quam similis huic, qua calcaneo aptatur remedium, femori arripiantur, hoc æque frequenter arripitur, applicanda. Nil est minus nulli partimicos vulgares ita curationes suas instituere, ceu qui ad has ab omni disciplina imparati accedunt, nec proinde aliter agere queunt. Id multo mirabilius est, inter Medicos sane doctos exstitisse, qui scientiam humani corporis tum sani, tum ægri, rerumque præterea naturalium in Medicina supervacuam esse contenderent: cum sine illa omni sæpe scire nequeat, quæ pars corporis maxime laboret, cui parti vel præcipue, vel utiliter tamen remedia prospicienda sint, & quæ tandem horum præ reliquis agro convenient. Sed fidem fere superat, fuisse semper inter Medicos, qui rationales sese profitentur, multos Theoriæ obtrectatores: quasi agere sine hac non sit idem, ac sine lumine artem pictoriam exercere: quod sane facere ad præscripta quædam non impossibile est, sed quam belle, cuiusvis intelligere licet. Longe vero alia via ad Hygiænæ sacraria contendendum TIBI esse, CLARISSIME CANDIDATE, recte judicasti, ex quo tempore ejus rei causa in hanc Academiam TE contulisti. Instructus jam iis copiis litterariis, quas afferre debent in Academias,*
qui

qui in hoc mercatu bonas artes sibi comparare gestiunt, Medicinæ partes omnes theoreticas & practicas ordine, seduloque tractavisti, attentus semper, quomodo observationes & rationes sibi mutuo inservirent, & alteræ alteris lumen accenderent. Quoque id rectius facere posses, præstantissimorum Medicorum consilium secutus, disciplinas mathematicas & philosophicas præcipuas cum medico studio semper conjunxisti. Quare ut nemini Ordinis nostri dubium ante ullum fuerat, probe paratum ad praxin medicam faciendam TE aliquando accessurum, & Medici veri nomen re tuiturum: ita multo magis in ea opinione confirmati fuimus in iis examinibus, quæ promptum ac perscrutanda habent, & quibus TE quoque studiorum exhibes dissertatione. Alijs specimen TVORVM borata; & crastino die dabis sine dubio, ~~di~~ in se elaborata in illa ea promptitudine & doctrina, qua in tantæ arena Commilitonibus TVIS victoriam sæpe dubiam reddere annixus es. Ne autem TIBI eam aliquis eripiat, minime vereor; & obtenta illa, laurea doctorali, ut bene merentem, laetus & plaudente toto choro TE condecorabo. De quo decore jam nunc TIBI ex animo gratulor, nec minus de omni vita Academica apud nos probe peracta. Adsit porro Summum Numen studiis TVIS & consiliis omnibus, ut Suam ante omnia iis gloriam promoveas, sanitatem plurimorum conserves & restituas, Patriam ornas, & res TVAS omnes ad exemplum PARENTIS TVI, VIRI JURISCONSULTISSIMI, ET IN EO DICENDO EXERCITATISSIMI semper felicissime agas. Ita diu senectutem Illius oblectare, Helmstadii, grati quondam Ejusdem hospitii, & unde maternam genus ducis, cum Eo memor vive, & me, quod facis, ama. Vale. Dab. A. O. R. CLIOCCXLV.

d. 26. Sept.

☞) ☼ (☞

